



# SIARAN MEDIA

## WEBINAR SEMPENA SAMBUTAN HARI HIDUPAN LIAR SEDUNIA 2022 PERINGKAT KEBANGSAAN

Saya telah merasmikan webinar bersempena Sambutan Hari Hidupan Liar Sedunia (*World Wildlife Day*) 2022 Peringkat Kebangsaan anjuran Kementerian Tenaga dan Sumber Asli (KeTSA) dengan kerjasama Jabatan Perlindungan Hidupan Liar dan Taman Negara (PERHILITAN) Semenanjung Malaysia, Jabatan Hidupan Liar Sabah dan *Sarawak Forestry Corporation* pada hari ini.

Saya mengucapkan penghargaan kepada YAB Datuk Patinggi (Dr.) Abang Haji Abdul Rahman Zohari bin Tun Datuk Abang Haji Openg, Premier Sarawak dan YAB Datuk Seri Panglima Haji Hajiji bin Haji Noor, Ketua Menteri Sabah yang turut menyampaikan aspirasi Sarawak dan Sabah dalam konservasi hidupan liar.

Webinar ini diadakan bertujuan meningkatkan kesedaran masyarakat mengenai kepentingan menjaga dan memulihara hidupan liar dengan mengetengahkan usaha-usaha konservasi di Semenanjung Malaysia, Sabah dan Sarawak. Tiga siri webinar ini menfokuskan tentang memulihara spesies hidupan liar ikonik negara, isu dan cabaran semasa pemuliharaan hidupan liar dan perkongsian pengalaman wira hidupan liar tidak didendang (*unsung heroes*). Barisan moderator dan ahli panel terdiri daripada pakar-pakar dalam bidang konservasi hidupan liar.

Saya telah menggariskan 5 tindakan proaktif KeTSA yang akan diteruskan untuk pemuliharaan hidupan liar dan habitatnya seperti berikut:

- (i) mengukuhkan keberkesanan perundangan konservasi hidupan liar melalui penguatkuasaan Akta Pemuliharaan Hidupan Liar [*Akta 716*] (Pindaan) 2021;
- (ii) memperkasakan usaha-usaha konservasi Harimau Malaya antaranya melalui penubuhan Pasukan Petugas Kebangsaan Bagi Konservasi Harimau Malaya (*National Tiger Conservation Task Force - MyTTF*) dan pengukuhan rondaan penguatkuasaan dan pengawalan (*boots on the ground*);
- (iii) mengukuhkan sumber dana bagi membiayai konservasi hidupan liar melalui mekanisme REDD Plus dan pembiayaan *Global Environment Facility* (GEF);
- (iv) meningkatkan reputasi dan kepimpinan negara dalam konservasi hidupan liar melalui *The 4<sup>th</sup> Asia Ministerial Meeting on Tiger Conservation* (AMC4) dan usaha-usaha memerangi pemburuan haram dan pemerdagangan hidupan liar (*illegal wildlife trade*); dan

- (v) meningkatkan kesedaran masyarakat dan penglibatan rakan strategik seperti *Malaysian Palm Oil Green Conservation Foundation* (MPOGCF) dan Persatuan Bolasepak Malaysia (FAM) bagi kerjasama konservasi hidupan liar.

YAB Premier Sarawak semasa menyampaikan aspirasinya menegaskan bahawa Sarawak sentiasa komited dalam memelihara hidupan liar di daratan dan marin dengan menyediakan Taman-taman Negara, Santuari Hidupan Liar dan Rizab Semula Jadi. Usaha-usaha pemuliharaan ini menjadi keutamaan dan merupakan sebahagian daripada fokus Majlis Tindakan Ekonomi Sarawak serta Strategi Pembangunan Pasca COVID-19 2030.

YAB Ketua Menteri Sabah pula menegaskan komitmen Sabah untuk memastikan insiden kepupusan spesies Badak Sumatera tidak berulang dan berazam untuk mengukuhkan usaha-usaha memelihara spesies terancam seperti Gajah, Orangutan, Tembadau, Harimau Dahan dan Monyet Belanda. Beliau memaklumkan sebanyak RM5 juta telah diperuntukkan bagi tujuan melaksanakan aktiviti dalam Pelan Tindakan Spesies Terancam di Sabah untuk tempoh lima tahun akan datang.

Hari Hidupan Liar Sedunia disambut di seluruh dunia pada 3 Mac setiap tahun untuk meningkatkan kesedaran masyarakat mengenai kepentingan memelihara hidupan liar dan habitatnya. Pada tahun ini, "**Memulihkan Spesies Utama untuk Restorasi Ekosistem**" atau "**Recovering Key Species for Ecosystem Restoration**" telah dipilih sebagai tema yang memberi fokus kepada pemuliharaan flora dan fauna yang diancam kepupusan.

Hidupan liar dan habitatnya merupakan khazanah negara yang amat bernilai dalam menjamin kestabilan ekosistem untuk kesejahteraan hidup kita. Oleh itu, sambutan Hari Hidupan Liar Sedunia pada hari ini mengingatkan kita supaya meningkatkan lagi usaha melindungi hidupan liar serta habitatnya dalam situasi yang sangat mencabar ekoran perubahan guna tanah, pemburuan dan perdagangan haram, fenomena perubahan iklim serta penyakit zoonotik.

KeTSA berharap kerjasama erat yang sedia terjalin antara Jabatan PERHILITAN, Jabatan Hidupan Liar Sabah dan *Sarawak Forestry Corporation* dalam pengurusan dan pemuliharaan hidupan liar di negara ini dapat terus diperkukuhkan.

**YB DATUK SERI TAKIYUDDIN BIN HASSAN**  
**MENTERI TENAGA DAN SUMBER ASLI**

**3 MAC 2022**

---

Unit Komunikasi Korporat | Kementerian Tenaga dan Sumber Asli

Tel. : 03-8000 8000 | Faks : 03-8889 4763 | Web [www.ketsa.gov.my](http://www.ketsa.gov.my)



KeTSAMalaysia



KeTSAMalaysia



[ketsa.malaysia](https://www.ketsa.malaysia)